

Evening Dogri (NSD) News Bulletin

27 Sept. 2025

आकाशवाणी

खबरां

- प्रधानमंत्री नरेन्द्र मोदी होरें ओडिशा दे झारसुगुडा थमां 60 हजार करोड़ रपे थमां मति विकास परियोजनाएं दा उदघाटन कीता ते नींह पत्थर रक्खेया। उनें आखेया भारत दूरसंचार प्रौद्योगिकी दा वैश्विक केन्द्र बनने बक्खी अगगे बदा रदा ऐ।
- प्रधानमंत्री होरें स्वदेशी तकनीक कन्नै बने दी 97 हजार 500 4-जी मोबाईल टॉवरें गी शुरु करवाया।
- भारत नै पाकिस्तान पर आतंकवाद दा महिमामंडल करने ते भारत-पाकिस्तान संघर्ष दे तत्थें गी तरोड़ी-मडोड़ियै पेश करने दा आरोप लाया ऐ।
- सैलसफा राज्यमंत्री सुरेश गोपी होरें आखेया जे भारत नै सम्पर्क गी अपने सैलसफा दृष्टिकोण दे केन्द्र च रक्खे दा ऐ।
- मौसम विभाग नै अज्ज पच्छमी ते दक्खनी भारत ते ओडिशा दे केई हिस्सें च बड़ी मती बरखा दी चेतावनी जारी कीती ऐ।
- पैरा विश्व तीर-अंदाजी प्रतियोगिता च भारत नै 7 पदक जिते न । शीतल देवी नै 18 बरे दी बरेसू च पैरा विश्व तीर-अंदाजी चैम्पियन बनियै इतिहास रचेया ऐ।

<><><><><><>

PM Odisha

प्रधानमंत्री नरेन्द्र मोदी होरें ओडिशा दे झारसुगुडा च 60 हजार करोड़ रपे थमां बी मती केई विकास परियोजनाएं दा उदघाटन कीता ते नींह पत्थर रक्खेया। एह परियोजनां दूरसंचार, रेल, उच्च शिक्षा,

स्वास्थ्य सेवा, कौशल विकास ग्रामीण आवास सनें बक्खरें-बक्खरें क्षेत्रें कन्नै जुडी दियां न। श्री मोदी होरें गुजरात च सूरत दे उधना ते ओडिशा दे बरहामपुर बश्कार “अमृत भारत एक्सप्रेस” गी वर्चुएल माध्यम दे राहें हरी झंडी दस्सी। इस मौके ओडिशा दे राज्यपाल हरि बाबू कम्भम्पति, मुखमन्त्री मोहन चरण मांझी ते होर गणमान्य लोक बी मजूद हे। तोंआई केन्द्रीय रेल मन्त्री अश्विनी वैष्णव ते केन्द्रीय जल शक्ति मन्त्री सी.आर. पाटिल उधमा रेलवे स्टेशन पर मौजूद हे। सभा गी सम्बोधत करदे होई प्रधानमन्त्री होरें आखेया ऐ केन्द्र सरकार नै हालिया दिनें च गै ओडिशा च दंडु सैमीकंडक्टर युनिटें दी मंजूरी दिती ऐ ते इक सैमीकंडक्टर पार्क बनाने दी योजना ओडिशा दे उद्योग ते प्रोद्योगिकी क्षेत्र गी हो] अगगे लेइयै जाने आस्तै महत्वपूर्ण गैं ऐ।

<><><><><><>

India- Pak UNGA

भारत नै जंदे मई महीने पाकिस्तान कन्नै होए दे संघर्ष बारे तत्थें गी त्रोडी-मरोड़ियै पेश करने ते आतंकवाद दा महिमामंडन करने पर पाकिस्तान दी सख्त निंदेया कीती ऐ। संयुक्त राष्ट्र महासभा च पाकिस्तान दे प्रधानमन्त्री शाहबाज शरीफ दे सम्बोधन दे मगरा एदे पर भारत दी तरफा परता दिंदे होई भारत दे स्थाई मिशन च प्रथम सचिव पेटल गहलोत होरें आखेया जे भारत दी धरतै पर होए दे आतंकवादी हमलें लेई पाकिस्तान कसूरवार ऐ ते भारत गी पूरा अधिकार ऐ जे ओ आत्म-रक्षा लेई सख्त गैंई पुट्टै। भारत कन्नै रमानदारी दे शाहबाज शरीफ दे दावें पर प्रतिक्रिया दिंदे होई गहलोत होरें आखेया जे पाकिस्तान गी फौरी तौर पर अपनी धरतै पर चलै करदे सब्भनें आतंकवादी कैम्पें गी बंद करियै बड्डे ते बदनाम आतंकवादियें गी भारत दे हवाले करी देना चाहिदा। दुनिया गी गुमराह करने दे दोषी पाकिस्तान गी शैल फटकार लांदे होई उनें आखेया जे भारत परमाणु धमकी दे अगगै कदे बी नेंई झुकोग ते आतंकवाद ते इसी चलाने आलें गी दना बर्दाश्त नेंई करोग।

<><><><><><>

Tourism MoS Suresh Gopi

सैलसफा राज्यमंत्री सुरेश गोपी होरें आखेया ऐ जे भारत नै सम्पर्क गी अपने सैलसफा दृष्टिकोण दे केन्द्र च रखेया ऐ। अज्ज नमीं दिल्ली च विश्व सैलसफा दिन दे उपलक्ष्य पर आयोजित कार्यक्रम च बोलदे होई श्री मोदी होरें आखेया ऐ जे “उड़ान” योजना जनेही पैहलें सैलसफा थाहरें तकर सम्पर्क च सुधार कीता ऐ ते उस्सी सौक्खा बनाया ऐ। मंत्री होरें अगगे आखेया जे स्वदेश दर्शन 2.0 जनेही पैहल न सामें सैलसफा थाहरें दे विकास ते “प्रसाद” स्कीम नै तीर्थ थाहरें दे विकास गी सुनिश्चित कीता ऐ। नीति आयोग दे उपाध्यक्ष सुमन बैरी होरें अपने सम्बोधन च विदेशी पर्यटन गी बढ़ावा देने दौरान भारतीय आस्तै सैलसफा सस्ता ते सुलभ बनाने सरबन्धी चनौती बक्खी इशारा कीता।



Tourism Day

अज्ज मनाए जा रदे सैलसफा सरबन्धी कुल संसारी ध्याड़े दे मौके पर लैफ्टिनेंट गवर्नर मनोज सिन्हा होरें सब्भनें गी साद्दा दिता ऐ जे ओ भारत दे सिरै दा ताज खोआने आले जम्मू-कश्मीर दी यात्रा पर पक्क गै औन ते इत्थू दे कुदरती छलैपे सगगो-सार, सांस्कृतिक विरासत ते बेजोड़ परौहनाचारी दा तर्जुबा हासल करन। सैलसफा सरबन्धी कुल संसारी ध्याड़े दे मौके पर अज्ज कटड़ा च श्री माता वैष्णो देवी जी दी यात्रा दे पारम्परिक मार्ग गी बढ़ावा देने दे मकसद कन्नै विरासती सैर आले इक कार्यक्रम दा आयोजन कीता गया। कटड़ा दे SDM पीयूष धोत्रा होरें इस विरासती सैर गी झंडी दस्सियै रवाना करोआया। सैलसफा सरबन्धी कुल संसारी ध्याड़े दे मौके पर अज्ज जम्मू खिते दे मानसर, पत्नीटाँप, बसोहली ते राजौरी इलाकें च बी कार्यक्रमें दा सरिस्ता कीता गया, जिस दौरान किछती रैली, सांस्कृति प्रोग्राम, पर्यावरण दे अनुकूल सैर ते बक्ख-बक्ख मुकाबलें आले कार्यक्रम आकर्षन दा मुख् केन्द्र रेह। खरी मती गिनतरी च मुकामी लोकें ते सैलानियें इनें कार्यक्रमें च हिस्सा लैता।



Sewa Parv

मुख्य भरै च मनाए जा रदे सेवा पर्व दे अंतर्गत अज्ज अस तुसेंगी दस्सगे कि किस चाली नरेन्द्र मोदी सरकार नै “एक भारत, श्रेष्ठ भारत” आली पैहल दे तैहत अनेकता च एकता दे भारत दे जज्बें गी होर मजबूत बनाने दा कम्म कीता ऐ। प्रधानमंत्री नरेन्द्र मोदी हुंदे आसेया 2015 च रम्भी गेदी ए “एक भारत, श्रेष्ठ भारत” आली पैहलकदमी देशवासियें दा दिल बदांदी ऐ जे ओ इक दूए दे राज्यें दी संस्कृति, भाषा ते परम्पराएं बारे जानकार बनन ते उन्दे कन्नै जुड़न। बक्ख-बक्ख खितें च समुदायें गी आपूं-चे जोड़ियै इस कार्यक्रम नै भाईचारे ते इक-जुटता दियें तंदें गी हर मजबूत कीता ऐ ते भारत दी समृद्ध सांस्कृतिक विरासत दा जश्र बी मनाया ऐ।



GST Reforms

नमें जी.एस.टी सुधारें दे तैहत सरकारै केई सारी ऐसी चीजें पर बी टैक्स दी दर गी घट्ट कीता ऐ जेह्दे कन्नै सैलसफा ते सार्वजनिक ट्रांसपोर्ट आले खेतर मते किफायती बनी गे न। इनें सुधारें कन्नै बक्ख-बक्ख खेत्तरें च रास-पूंजी ते कम्म-रोजगार दे मौके बी पैदा होआ करदे न। साड्डे 7 ज्हार रपे इक रात दे स्हाबै मिलने आहले होटल दे कमरे पर जी.एस.टी दी दर गी 12 फीसद शा घटाइयै 5 फीसद करी दित्ता गेआ ऐ।



PM-MKB

प्रधानमंत्री नरेन्द्र मोदी होर कल दिनै 11 बजे अपने माहवार रेडियो कार्यक्रम “मन की बात” दे राएं देश-बदेश च रौहने आहले लोकें कन्नै अपने बचार सांझे करडन। एहू इस कार्यक्रम दी 126मीं किशत

होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नो आकाशवाणी खबरें दी वेबसाइट ते न्यूज़ ऑन ए.आई.आर मोबाइल ऐप ते डीडी न्यूज़, आकाशवाणी न्यूज़, प्रधानमंत्री हुं'दे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाह्ग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाह्ग जिसी तुस रातीं 8 बजे इक बारी परतियै बी सुनी सकदे ओ। आकाशवाणी जम्मू दे प्रादेशिक समाचार एकांश आसेआ कल रातीं साड्डे 10 बजे मन की बात पर इक बशेश परिचर्चा बी प्रसारत कीती जाह्ग जेहदे च साड्डे परौहने होडन वरिष्ठ पत्रकार ते नामवर लखारी संत कुमार शर्मा ते उं'दे कन्नै गल्लबात करडन साड्डे न्यूज़ एन्कर जगमोहन शर्मा।

<><><><><><>

Weather

भारतीय मौसम विभाग नै अज्ज छतीसगढ़, केरल, माहें, कोंकण, गोवा, ओडिशा, महाराष्ट्र, उत्तर अंदरुनी कर्नाटक ते तेलगाना च भारी बरखा दा ओरेंज अलर्ट जारी कीता ऐ। तोंआई उत्तर-पच्छमी ते उसदे कन्नै लगदे पच्छमी मझाटले बंगाल दी खाड़ी च बने दे दबा करी ओडिशा दे मते सारे हिस्सें च भारी बरखा होआ दी ऐ।

<><><><><><>

Sitharaman –KEC 2025

केन्द्रीय वित्तमंत्री निर्मला सीतारमण होर अगले महीने दी 3 तरीक गी नमीं दिल्ली च “Koutilya आर्थिक सम्मेलन 2025” दे चौथे अडिशन दा उदघाटन करगंन। इस सम्मेलन दा विशे “मुश्कल समें च खुशहाली दी तपाश ऐ”। एह विशे भारत दी विकास उम्मीदें ते बड़ी मती अनिश्चता, उछल-पुथल ते बदलदी भू-राजीनति दे दौर च ओहदी सफलता दे संदर्भ च प्रासंगिक ऐ। “Koutilya आर्थिक सम्मेलन

2025” भारत गी घरेलू प्राथमिकाएं गी वैश्विक नजरिये कन्नै दिक्खने ते उथल-पुथल दे दौर च खुशहाली दा रस्ता तुप्पने दा इक चेचा मंच ऐ। संचार मंत्री ज्योतिरादित्य सिंधिया हुंदा बी “संचार: उभरदी प्रोद्योगिकी” विशे पर चर्चा दी अध्यक्षता करने दा कार्यक्रम ऐ। विदेशमंत्री डाक्टर एस. जयशंकर होर सम्मलेन दे अखीर दिन भारत दी विदेश ते आर्थिक नीति पर बोलियै कार्यक्रम दा समापन करगंन।

<><><><><><>

Jitendra Singh GST

प्रधानमंत्री हुंदे दफ्तरै च राज्य मंत्री डाक्टर जितेन्द्र सिंह होरें अज्ज डोडा कस्बे दा दौरा लाया ते उत्थें मुकामी बजारें च जाइयै दुकानदारें, कारोबारियें ते बसनीकें कन्नै गल्लबात कीती ते माल ते सेवा कर (जी.एस.टी) गी घट्ट करने दे सरकार दे हालिया फैसलें बारे उंदी प्रतिक्रिया हासल कीती। दुकानदारें नमीं जी.एस.टी नीति दा सोआगत करदे होई आखेया जे एहदे कन्नै नां छड़ा बपारियें गी सगुआं आम उपभोक्ताएं गी बी राहत थोग। उनें सरकार दी इस पैहलकदमी दी सराहना करदे होई आखेया जे एहदे कन्नै बपार गी बढ़ावा थोग ते लोकें पर माली बोझ बी घट्ट होग।

<><><><><><>

Palestine-India

भारत च फिलिस्तीन दे राजदूत अब्दुल्ला अबू शावेश होरें फिलिस्तीनी लोकें दा समर्थन करने आस्तै प्रधानमंत्री नरेन्द्र मोदी हुंदे नेतृत्व आहली सरकार दी सराहना कीती ऐ। मीडिया कन्नै गल्लबात करदे होई श्री शावेश होरें जोर दिता जे प्रधानमंत्री मोदी हुंदे नेतृत्व आहली भारत सरकार संयुक्त राष्ट्र राहत प्रयासें दा समर्थन करा दी ऐ, जेहड़ा फिलिस्तीनी लोकें दी मदाद आस्तै ऐ।

<><><><><><>

Sheetal World Champ

जम्मू-कश्मीर दे किश्तवाड़ दी 18एं बरे दी भारतीय पैरा तीरअंदाज शीतल देवी होरें अज्ज दक्खन कोरिया दे गवांगजू च पैरा विश्व तीर-अंदाजी चैम्पियनशिप च तुर्की दी दुनिया दी नम्बर इक खडारी ओज़नूर क्योर गिरदी गी 146-143 कन्नै हराइयै महिलायें दे कपाउंड व्यक्तिगत स्पर्धा च सुन्ने दा तगमा अपने नां करी लैता। टूर्नामैन्ट च इकलौती बगैर बांहे आली तीर-अंदाज शीतल नै अपने पैरें ते ठुडी कन्नै स्टीक निशाने जाए ते चैम्पियनशिप च अपना त्रिया तगमा हासल करी लैता। एहदे शा पैहले उनें कपाउंड स्पर्धा दे मुकाबले च तोमन कुमार कन्नै रलियै मिक्सड टीम दा कैह दा तगमा जितेया हा, उनें ब्रितानिया दी जोड़ी ग्रिनहैम ते नाथन मैकक्वीन गी 152-149 कन्नै हराया हा।

<><><><><><>

World Para Athletics

12वीं विश्व पैरा एथलेटिक्स प्रतियोगिता 2025 अज्ज नमीं दिल्ली दे जवाहर लाल स्टेडियम च शुरु होई। नवें दिन दी इस प्रतियोगिता दौरान 186 तगमे आस्तै मुकाबले होगंन। एहदे च मर्दे दे 101, महिलायें दे 84 ते इक मिक्स तगमा शामिल ऐ। इस प्रतियोगिता दा समापन अगले महीने दी 5 तरीक गी होगा।

<><><><><><>